

## CONVENIO DE COLABORACIÓN ENTRE A AXENCIA DE TURISMO DE GALICIA E O CONCELLO DE SALVATERRA DE MIÑO PARA A CONSOLIDACIÓN DE FONTE DA CASA DA INQUISICIÓN

O xerente de Turismo de Galicia

### DECLARA:

Que esta Axencia de Turismo de Galicia formalizou co Concello de Salvaterra de Miño o instrumento convencional arriba referido por un período de vixencia que abrangue dende a data da súa sinatura ata o 31 de decembro de 2025.

Que o instrumento convencional ten por obxecto establecer o marco de colaboración entre Axencia de Turismo de Galicia e o Concello de Salvaterra de Miño para a consolidación de fonte da Casa da Inquisición.

Que existe converxencia de intereses entre as entidades asinantes en orde á consecución obxecto referido.

Que o instrumento convencional que se pretende asinar se **fundamenta** no seguinte:

**Primeiro.-** A Axencia de Turismo de Galicia, en virtude do disposto no artigo 9 dos seus estatutos, aprobados polo Decreto 196/2012, do 27 de setembro, é a entidade pública instrumental do sector público autonómico de Galicia á que lle corresponde o impulso e execución da política turística da Xunta de Galicia en relación coa promoción da calidade e a innovación, o desenvolvemento, mellora, información e difusión do sector turístico galego, potenciando a devandita oferta, mediante a comercialización, información e difusión do produto turístico da Comunidade Autónoma de Galicia.

Para lograr esta finalidade a Axencia de Turismo de Galicia acomete, no ámbito das súas competencias, un decidido apoio á promoción e fomento do sector turístico de Galicia a través daquelas accións que lle permiten acadar os seus obxectivos.

**Segundo.-** O Concello de Salvaterra de Miño, consciente da gran importancia e da gran responsabilidade que leva xestionar adecuadamente os espazos naturais, os bens de



interese cultural, así como os elementos do patrimonio tradicional e cultural de Salvaterra de Miño, dirixe os seus esforzos cara a conservación, divulgación e posta en valor dos recursos presentes no concello e dos valores polos que se declararon de interese. É por isto polo que se promove unha actuación dirixida á posta en valor turístico dun dos elementos de interese etnográfico existente no concello: a fonte da Casa da Inquisición, na parroquia de Corzáns, concello de Salvaterra de Miño.

No catálogo das Normas Subsidiarias de Planeamento Municipal do concello de Salvaterra de Miño inclúense na parroquia de San Miguel de Corzáns os seguintes elementos: Casa da Inquisición e escudos da Casa da Inquisición. Este elemento consiste nun portalón de cantaría de granito que servía de acceso á antiga Casa da Inquisición, da cal se conservan algúns restos. Trátase de elementos anteriores ao ano 1901, e en aplicación do establecido no artigo 83.3 da Lei 5/2016, do 4 de maio, do patrimonio cultural de Galicia, relativo aos bens que integran o patrimonio artístico, teñen a consideración de bens de interese cultural.

Bartolomé Barbeito y Padrón, natural de Corzáns, obtivo o cargo de primeiro inquisidor do Tribunal Censor de Galicia no ano 1677. No ano 1688 deixou o seu cargo para fundar un edificio con dereito a capelanía e obras pías, denominado Pazo de Piñeiro ou da Inquisición. Este portalón correspondería a entrada desta Casa da Inquisición. Da edificación principal, unha casa-escola, apenas quedan vestixios pero o nome da casa deu lugar ao topónimo que identifica o núcleo.

A intervención que se propón consiste na consolidación da denominada Fonte da Casa da Inquisición, que se sitúa na parcela con referencia catastral 36050A06500492, situada a uns 100 m de distancia ao suroeste da devandita porta, dentro do ámbito de protección deste ben.

Trátase dun conxunto formado por tres muros de contención de cantaría de pedra (un deles desaparecido) que se situaba posiblemente dentro do predio matriz da Casa da Inquisición e que comparte elementos ornamentais e estilísticos coa Porta da Casa da Inquisición. Non obstante non conta con ficha individualizada de catálogo. Trataríase pois dunha construción auxiliar vinculada a este ben.

**Terceiro.-** A fonte está constituída por tres muros de contención de terras en forma de "U" arredor dun espazo pavimentado no que se sitúa un vaso soterrado de recollida das



augas. Estes muros foron realizados en cantaría de granito disposta en ringleiras regulares colocadas a óso, sen rexuntado e contan cun pequeno banco na súa base. No muro central hai tres fornelas cadradas na parte inferior, brotando da central as augas, e unha única fornela central na superior. A impresión xeral é que se puideron empregar pezas de cantaría xa labradas procedentes doutra construción, reordenadas para configurar este espazo arredor da fonte e do estanque.

O conxunto presenta unha considerable colonización vexetal con desprendementos de pezas de cantaría e perda da verticalidade. No muro do lateral dereito perdéronse algunhas das pezas molduradas de coroación e cornixa. O central presenta numerosos desprazamentos e desprendementos de perpiaños e o do lateral esquerdo está parcialmente derrubado, en boa parte pola incidencia das raíces das árbores.

A intervención proposta contempla os seguintes traballos:

- Roza e limpeza dos terreos traseiros da fonte e noiro, con levantamento de tocos e raíces existentes, así como retirada de terras.
- Limpeza de cantaría con auga a baixa presión e picado minucioso de xuntas, con limpeza e retirada de entullo.
- Desmontaxe e numerado de perpiaños e pezas de pedra, con provisión en parcela para posterior utilización.
- Montaxe de perpiaños e elementos de pedra amoreados na parcela para formación de fonte, con colocación a óso e reposición de ancoraxes interiores de unión con chaves de aceiro inoxidable. Rexuntado con morteiro de cal en xuntas abertas entre perpiaños.
- Subministración e colocación de cornixa de pedra de 80x25 cm das mesmas características que a existente, en remate superior de muro.
- Subministración e colocación de pezas varias de pedra das mesmas características que as existentes, en ocós de bancadas e lenzo da fonte, por perda de pezas.
- Muro de cachotería concertada de pedra granítica de derruba con cachotes colocados en seco con ripas entre xuntas, para contención de terras, con altura ata 2,00 metros.



- Traballos de limpeza, picado de xuntas e retirada de entullos, posterior recolocación de pezas soltas e rexuntado de lousas de solado e recolocación de banco.
- O novo muro do lateral esquerdo realizarase prescindindo das molduras.

A importancia que dende este concello se lle da á recuperación, conservación e posta en valor do patrimonio turístico, arqueolóxico e cultural local fai que unha das prioridades sexa a de cumprir cos principios de calidade e accesibilidade en todos eses destinos turísticos que dende este concello se pretenden valorizar como fomento do turismo.

Que a través deste convenio, outórgase ó Concello de Salvaterra de Miño unha subvención directa en virtude do disposto no artigo 19.4 c) da Lei 9/2007, do 13 de xuño, de subvencións de Galicia, polas razóns de interese público, social, económico e humanitario expostas nos puntos anteriores que dificulta a súa convocatoria pública, de conformidade co previsto no artigo 26.2.a) da Lei 9/2007 do 13 de xuño, de subvencións de Galicia.

Que os intereses converxentes das partes asinantes exclúen o ánimo de lucro, e non poden satisfacerse axeitadamente mediante a celebración dun contrato dos contemplados Lei 9/2017, do 8 de novembro, de contratos do sector público, ou doutro instrumento alleo á natureza estritamente convencional.

En atención ao exposto, e a fin de dar cumprimento ao preceptuado no artigo 15.2. da Lei 1/2016, de 18 de xaneiro, de transparencia e bo goberno, estímase xustificado o recurso á sinatura do instrumento convencional que se pretende, con exclusión doutras figuras.

E para que conste, asíñase esta memoria, en Santiago de Compostela

O xerente de Turismo de Galicia

Antonio Casas Calviño

